

家
藏
書
集

熊襄愍公集卷四

前經略遼東疏

部調紙上有兵疏

題爲部調紙上有兵出關無兵目今欽奉御旨勅令撥防鎮江
聲援朝鮮無憑防援懇乞嚴勅兵部迅催原調兵將并覆新添
各兵因內援外以保危遼事頃閱邸報見兵部覆遼東巡撫周
永春朝鮮貢道二綫微存勢迫形孤遼隔易斷急宜添設兵衛
嚴加防守一疏恭奉聖旨鎮江等處應准巡撫周永春所奏廣
添兵將就著經略熊廷弼酌量委撥務用精兵良將汰盡老弱

殘廢謹防密護足爲朝鮮聲援其有兵將未到的都著刻期嚴催出關以備調用不得遲誤軍機致干參處欽此臣惟朝鮮北關皆我右蔽今東西旣通北關又陷僅朝鮮一道作我藩籬存亡相倚敢不悉心綢繆強我兵力壯彼聲援日者所陳戰守大略議於鎮江添兵設將且先於九月間遣廢將胡國臣領召募新兵二千九百五十八人前往鎮江王平領新兵一千八百九十六人前往潁陽湯遇時領新兵一千一百六十九人前往寬奠單盡忠領新兵三千一百五十五人前往清河協同見住將官戴光裕韓宗功等相機守援臣亦會酌量委撥之早矣但前

項新兵皆南衛銀差僉派強逼而來之民力不能掇石手不能
挽弓稍一勞之以力役束之以軍法皆十百成羣公然散去前
者無兵可遣不得已遣此張一虛聲以見我兵之漸東而實不
能使之強盛足爲朝鮮聲援也乃兵部所調援兵俱是紙上虛
數十無二三到遼陽者欲委撥而無可委撥欲嚴催而誰與嚴
催臣請據見到各兵實數見撥各兵地方爲皇上細陳之案查
兵部陸續來咨大約謂自征戰失利按臣報陣亡者四萬五千
餘名見存四萬二千三百六十餘名續到川兵一萬五百三十
二名撫臣召募兵一萬四千二百五十八名先調已發未出關

湖廣兵約一千五百名臣部續調兵一萬七千五百名內已出
關兵七千六十名已發未出關兵二千七百名見催未發兵七
千七百四十餘名總計遼左見在已到兵共七萬四千二百餘
名邇者開原破陷必多損傷再議調近鎮素練之兵與選用見
任及廢閒各有家丁將官前後通計薊宣真保延大各省鎮及
祁魯二家調兵一十萬一千六百五十名又議於大同延綏各
募兵五千名宣府山西甯夏固原昌平各募兵二千名共募兵
二萬名以足中府會議十二萬兵之數此係兵部六月三十日
題過清數凡六月以前已到未到數目已經部查明白惟自七

月起至十一月止細算各兵之到遼者大同遊擊李尚義八百
二十六員名保定千總米繼龍三百四十一員名河間把總程
遇道三百員名山西把總劉興漢三百九十三員名以七月內
到薊鎮坐營談堯德三百七十八員名延綏遊擊李茂先二千
八百員名以八月內到宣府守備郝鳴時一千員名薊鎮都司
王象一千五百九員名真定百總明尚進二百名天津右營千
總夏邦卿四百一員名保定忠順營千總戴其爵八百二員名
真定千總楊時英二百六十五員名山西守備郭世藩一千三
百名甘肅涼州千總王崇信王益七百二員名山東遊擊別鎮

二千名以九月內到大同坐營方承勳一千員名於十月內到
宣府守備劉進忠一千員名青州兵一千名以十一月內到以
上總計一萬五千一百二十八員名內除山東標兵二千員名
天津右營兵四百一員名青州兵一千員名暫留廣甯外實到
遼者止得一萬一千七百二十七員名爲各鎮發來原數而
間逃故如延綏兵二千八員名一路逃故一百三十八名之類
則見到一萬一千七百二十七員名未可據爲實數也此外惟
有援遼副將鮑承先領開原道募兵二千一十六員名不在咨
調之內卽咨內撫臣招募一萬四千二百五十八名兵部已作

數及查撫疏半係餉司馮汝京巡道張銓等所招止得
張斌良領兵一千名到遼陽餘俱存操廣甯尚費沙汰半係贊
畫劉國縉所招內如下爲鵬等領兵三千三百四十一名楊子
渭領兵一千八百八十三名共五千二百二十四名除汰去一
千九百八十一名逃去二千三百餘名止存九百餘名是咨中
一萬四千二百餘人而僅僅得二千人之用也此見到各兵之
實數也遼陽與自在州南北連城九門二十餘里除民兵擺守
外每垛貼步兵二名計垛三千餘應貼兵六千餘人每二十五
垛劄兵一隊爲遊兵如一垛有急則該隊羣趨并拒以免別垛

亂動應置兵六千餘人兩項應用一萬二千餘人今止有南浙殘兵與保殘兵及續到兵山東水營殘兵八千餘人貼守尙少三千餘人無處查撥城內每面應置馬兵二千人爲遊騎今止有臣標下內丁標左殘兵協營奇兵及新到大同宣府援兵五千餘人分守尙少三千餘人無處查撥城外劄營惟川兵一萬一千餘人內除九門每門撥去一百五十人防守外止餘九千餘人分劄兩營元武營五千餘人自劄一營尙餘贊畫召募新兵五千餘名恐有奸細夾雜既不敢使貼防於城內又不能獨劄立於城外惟分發各邊堡設防而此外則總兵賀世賢領馬

步一萬一千餘人柴國柱領馬步一萬一千餘人李懷信除將
原分廣甯兵馬交付李光榮掌管外止領馬步七千餘人各駐
防虎皮驛三塊石等處當其來路頃報西人五萬結聚養善木
昨又近至長甯堡邊外復令李懷信移駐遼陽首山迤南賀世
賢移駐遼陽迤北以防西人之深入東兵之乘虛此見撥各兵
之地方也皇上試令兵部科道中外諸臣細算見到兵數細想
見撥地方何處不必防守何兵尙可謄那應撥鎮江以爲朝鮮
聲援則臣卽撥去不敢違而如其一人一騎不能撥也則兵部
奈何誑皇上以紙上之虛數不亟守催而欲陷臣以他日失悞

之罪哉頃聞毛兵二千餘人將到及零星出關者只穀補足城
守前數及海蓋道屢討兵馬防守海州東昌三岔河一帶今亦
無兵可撥卽瀋陽今冬如幸保全明春無有不守之理亦不知
將何兵將委撥卽今東以四萬騎二萬步入駐開原打庄家運
糧窖欲令三總兵揚兵於汎懿之北以示恢復或聲言於撫順
之東以張疑兵而促其速歸三總兵皆慮兵馬寡怯不能戰又
慮西人五萬騎之見聚養善木者乘我兵東出而從西入搶待
我兵北行而從中隔斷以此躊躇皆按兵不敢動似此光景何
論鎮江何論朝鮮頃得閱臣姚宗文書大略謂昨者北關出於

不意不能相救今又聞有攻朝鮮消息便當預辦戰將勁兵以待之如果引兵渡江則以兵萬人聲言搦戰以兵萬餘逆之江上約朝鮮腹背攻之無使再得志於朝鮮致遼勢愈孤彼勢益熾我兵將之心愈寒欲守遼陽而不可得其意正與臣疏相合而無如我兵之單寡恐懼明知其攻朝鮮不能相救也此臣之所以屢請閱臣早駐遼陽欲其身履目見而爲此半個河東不絕如綫之命親切求救於皇上者也伏乞嚴勅兵部將各省鎮原調兵將作速差官馬上分催定限歲內俱到遼陽但有遲違坐以領軍官承調失期之律兵科仍查叅該撫鎮臣毋得抗旨

誤事兵過山海關總督逐一選驗人馬器械中用者出關不中
用者阻回另補免如前調虛糜糧餉其前所陳戰守大略疏內
應增兵數速覆遣調以備明年急用乃臣更有傷心墮淚欲請
問於皇上者今日遼東誰家之封疆今日北京誰家之宮寢皇
上之封疆宮寢也當事諸大臣身不在遼東無地方之責家眷
聞警皆送回原籍無宗祀之憂事急大家伏闕下一公疏了事
聽不聽隨得皇上封疆失有經略當罪而諸臣不與宮寢危有
皇上當禍而諸臣不與卽被叅劾至極不過一養病回籍而去
耳以此兵部尚書黃嘉善戶部尚書李汝華身擔兵餉重擔皆

圖全軀保妻子莫有肯爲皇上拚死力爭上緊幹辦者何況各省鎮督撫諸臣今日之事若非嚴旨切責而一斷之以誤邊誤國之法如世廟時事則兵部戶部誰肯處餉督撫鎮道誰肯遣將遣兵日挨一日不致亡遼東危北京而使皇上獨當大禍不已也當此之時卽按丁汝夢王忬王汝孝等故事盡戮諸臣亦何補於成敗存亡之數哉萬厯四十七年十一月二十六日具奏本月三十日奉旨據奏前此議調援兵多未出關憑何調遣防禦該部卽便馬上差官嚴催各省鎮原調兵將刻期赴遼以便戰守如再延違領兵官依律治罪撫鎮道臣一并查叅本兵

職司軍旅今調兵未到黃嘉善又要釋肩求去還著卽出供職
松應聘著一面料理部事以待嘉善之出毋得推諉今邊情緊
急內外當事諸臣都要畢力殫心措處兵餉毋致缺乏有怠緩
誤事者同罪不宥

欽限考成疏

題爲明旨催兵愈嚴中外虛應如故懇乞欽限考成急救殘遼并亟遣風力科臣駐劄山海關點驗援兵出關以免虛塞再誤封疆事前臣疏言部調紙上有兵過關無兵以虛數誑皇上者實查得自三月失事以來援兵到遼陽者止有此數止足抵開鐵失亡及召募新兵逃兵之虛數及見樞臣黃嘉善辯疏開列遼東見在新募出關三項自謂十萬之數僅少二千又是紙上之虛數而臣第出一揭以駁之不敢復瀆聖聽惟是事到于今冬寒已過春暖已來時候已逼事勢已蹙有不得不爲皇上之

封疆生靈求救於樞臣而望其受臣之言以實數相應者當去年八九月間開鐵連陷北關既亡遼陽已亡在旦夕顧臣時初到猶得用虛聲以恐之多方以悞之遂果疑懼不敢出今日久情見凡我兵之逃亡馬匹之倒死糧草之缺乏出關援兵之有無西來市馬之瘦損某營某處之孱弱某城某方之低塌一皆被奸細報知又兩人開鐵收割運糧誘賺我兵竟不敢出益窺我無能爲而恐之之法窮矣遲則三四月早則正二月定到遼陽城下有一番大舉動此非臣之臆度也凡拏到奸細解到回鄉皆供李永芳笑云如真保薊宣及南浙殘兵不吃飯